



REPUBLIKA E KOSOVËS - REPUBLIKA KOSOVA - REPUBLIC OF KOSOVO			
KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS			
NEZAVISNI NADZORNI ODBOR CIVILNE SLUŽBE KOSOVA			
INDEPENDENT OVERSIGHT BOARD CIVIL SERVICE OF KOSOVO			
Pranuar / Dorezuar Pamijeno / Profato Received / Delivery	28.04	1	viti god year
Organ / Njësia Org / Jedinica Org / Unit	Nr Prot Br Prot Prot No	Shtojca Prilog Appendix	Sasia Kolicina Quantity
SKIMSHTK	2052/2021		113



Republika e Kosovës
Republika Kosova - Republic of Kosovo
KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr. 147/2021

Këshilli i Pavarur Mbikëqyrës për Shërbimin Civil të Kosovës - Kolegji për Shqyrtimin dhe Vendosjen e Ankesave në përbërje nga: Ardita Haxhnikaj-Demi-kryetare, Arben Mehmeti dhe, Eshref Shabani-anëtarë, me Çlirim Zeka, Zyrtar i Lartë për Bashkëpunim Profesional në cilësinë e procesmbajtësit, ka shqyrtuar ankesën A.nr.147/2021 të datës 17.03.2021, të parashtruar nga ankuesi me adresë banimi fsh. Shtrubullove Rr."Agron Mehmeti" Nr.50 Drenas, kundër organit të punësimit Ministria e Industrisë, Ndërmarrësisë dhe Tregtisë, në çështjen juridike "Kompensim Material", duke vepruar në pajtim me nenin 6 paragrafin 1 nen paragrafin 1.1 dhe nenin 18 paragrafin 1 nen paragrafin 1.7 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, si dhe nenin 47 dhe nenin 48 paragrafi 1 të Ligjit Nr.05/L-031 për Procedurën e Përgjithshme Administrative, në seancën për këshillim dhe votim të mbajtur me datë 28.04.2021, mori këtë:

V E N D I M

Refuzohet si e pa bazuar ankesa me numër A. nr. 147/2021 e datës 17.03.2021 e parashtruar nga Ankuesi

A r s y e t i m

Ankuesi Zyrtar i Lartë për Teknologji Informativë në Ministrinë e Industrisë, Ndërmarrësisë dhe Tregtisë, me datë 17.03.2021 ka parashtruar ankesë me numër protokoll 1195/2021 të regjistruar me numër A.nr 147/2021 në Këshillin e Pavarur Mbikëqyrës për Shërbimin Civil të Kosovës, me pretendimin ankimor për njohjen e të drejtës për kompensimin e shtesës mbi pagën bazë sipas Vendimit Nr.02/39 të datës 08.10.2008 të Qeverisë së Kosovës.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Rregullores Nr.02/2018 për Procedurën e Shqyrtimit dhe Vendosjen e Ankesave, me datë 19.03.2021 ka dërguar kërkesën për përgjigje në ankesë tek Ministria e Industrisë, Ndërmarrësisë dhe Tregtisë. Këshilli me datë 26.03.2021 përmes shkresës me numër protokoll 1416/2021 ka pranuar përgjigjen në ankesë së bashku me shkresat e bashkangjitura të lëndës.

Kolegji për Shqyrtimin e Ankesave për vërtetimin e plotë dhe të drejtë të gjendjes faktike si dhe vendosjes në mënyrë meritore, administroje këto prova: Ankesën A nr. 147/2021, e datës 17.03.2021, drejtuar Këshillit të Pavarur Mbikëqyrës për Shërbimin Civil të Kosovës; Kërkesë për përgjigje në ankesë me numër protokoll 1289 e datës 19.03.2021; Kërkesë për aprovim të shtesave në pagë e datës 27.01.2021; Vendim i Qeverisë së Republikës së Kosovës me nr.02/39 i datës 08.10.2008; Lista dhe Titujt



e Punonjësve që do të jenë përfitues të masave stimuluese duke përfshirë edhe shumë për këto pozita; Vendim me nr. Ref.02/nr.339 i datës 04.12.2020; Akt Emërim i datës 26.02.2020; Përshkrimi i Detyrave të Punës i datës 05.05.2017; Diplomë me numër nr.1192 i datës 12.07.2017; Formulari për Vlerësimin e Punës Provuere i datës 22.01.2021; E-mail nga G.B. për G.I. i datës 29.01.2021; E-mail nga A.D. për T.M. i datës 11.02.2021; Rekrutim i datës 28.08.2019; Përgjigje në ankesë me numër protokoll 1416 i datës 26.03.2021; Diplomë me numër nr.559/12 i datës 03.11.2012; Lista e pagave prej muajit Mars 2020 deri në muajin Shkurt 2021; Vendim me numër nr.08/48 i datës 09.09.2015; E-mail nga A.D. për G.B. i datës 17.03.2021; E-mail nga I.Ll për A.D. i datës 12.03.2021; E-mail nga A.D. për T.K. i datës 11.02.2021;

Kolegji për Shqyrtimin e Ankesave, pasi ka shqyrtuar të gjitha shkresat e lëndës të parashtruara nga palët, ka konstatuar se ankesa e ankuesit, *është e pa bazuar sepse:*

Bazuar në provat e lëndës, gjegjësisht Akt e Emërimit e datës 26.02.2020, Kolegji ka konstatuar se ankuesi është i punësuar në pozitën e punës Zyrtar i Lartë për Teknologji Informativë, në Agjencinë për Investime dhe Përkrahje të Ndërmarrjeve, në kuadër të Ministrisë së Industrisë, Ndërmarrësisë dhe Tregtisë.

Ankuesi më datë 27.01.2021, ka parashtruar kërkesën për aprovim të shtesave mbi pagën bazë të Zëvendësuesi i Sekretarit të Përgjithshëm të Ministrisë së Industrisë, Ndërmarrësisë dhe Tregtisë.

Ndërsa Udhëheqësja e Personelit të Ministrisë së Industrisë dhe Tregtisë, me datë 11.02.2021 i është drejtuar në formë elektronike Departamentit të Menaxhimit të Zyrtarëve Publik (më tej DMZP), me kërkesë për shtesa mbi pagën bazë sipas Vendimit të Qeverisë së Kosovës Nr.02/39 të datës 08.10.2008. DMZP më datë 12.03.2021 ka ofruar përgjigje po në formë elektronike. në kërkesën e datës 11.02.2021, me sqarimin se ende nuk është themeluar Komisioni që do të mirrej me shqyrtimin e kërkesave të institucioneve të Shërbimit Civil lidhur me kompensimin e shtesave mbi pagën bazë të çfarëdo natyre qofshin ato.

Kolegji për Shqyrtimin e Ankesave gjatë shqyrtimit të ligjshmërisë se pretendimeve ankimore të ankuesit, ka analizuar Vendimin Nr.02/39 të datës 08.10.2008 të Qeverisë së Republikës së Kosovës, përmes të cilit është aprovuar lista e pozitave dhe shtesave në pagë për kategori të veçanta të profesioneve deficitare në fushën e teknologjisë informativë dhe inxhinieringut, dhe Vendimin Nr.07/29 të datës 31.07.2008 të Qeverisë së Republikës së Kosovës, me të cilin është përcaktuar procedura për parashtrimin dhe trajtimin e kërkesave dhe mënyra e realizimit të shtesave për kategoritë e veçanta të profesioneve deficitare, dhe rrjedhimisht është konstatuar se aprovimi i shtesave në pagë për pozita deficitare është bërë me qëllim të ruajtjes se kategorive të veçanta deficitare të punonjësve, stimulimit të konkurrimit për profesione të veçanta deficitare dhe zbatimit të parimit të pagesës se njëjtë për punë të njëjtë në të gjitha organizatat buxhetore. Po ashtu, me këtë vendim është përcaktuar se paga bazë së bashku me shtesat mbi pagë nuk mund të tejkalojnë pagën e zyrtarëve të lartë të emëruar nga KELP-i, si dhe është obliguar Ministria përgjegjëse për Administratë Publike dhe Ministria e Financave për shqyrtimin e listës dhe standardëve kualifikuese dhe shumë stimuluese për postet e caktuara, se paku një herë në gjatë muaj.

Kuvendi i Republikës së Kosovës, me datë 13.05.2010 ka aprovuar Ligji Nr.03/L-147 për Pagat e Nëpunësve Civil, përmes të cilit është bërë përcaktimi i sistemit dhe strukturës së pagave, shtesave dhe kompensimeve të tjera për nëpunësit civilë, ndërsa me dispozitat e nenit 14 të këtij ligji është përcaktuar se: 1. Shtesat mbi pagën bazë janë: 1.1. shtesa për punë me ndërrime dhe jashtë orarit të punës; 1.2. shtesa për kushte specifike pune; dhe 1.3. shtesa për kushtet e tregut. Përkitazi me këtë, duke u bazuar në dispozitat

e nenit 27 të Ligjit Nr.03/L-147 për Pagat e Nëpunësve Civil, Qeveria e Republikës së Kosovës, me datë 24.12.2012 ka aprovuar Rregulloren Nr.33/2012 për Shtesat në Pagë dhe Kompensime të Tjera të Nëpunësve Civil, përmes të cilës ka përcaktuar kushtet dhe procedurat për shtesat dhe kompensime të tjera mbi pagën bazë të nëpunësve civilë. Me hyrjen në fuqi të kësaj rregullore janë shfuqizuar të gjitha aktet nënligjore të cilat kanë rregulluar shtesat dhe kompensimet tjera të nëpunësve civil, dhe rrjedhimisht edhe Vendimi Nr.07/29 i datës 31.07.2008 dhe Vendimi Nr.02/39 i datës 08.10.2008 i Qeverisë së Republikës së Kosovës, konstatim ky i dhënë edhe në Raportin Vjetor të Vitit 2017 të Këshillit të Pavarur Mbiqyrës për Shërbimin Civil të Kosovës, kështu që duke u bazuar në këtë konstatim, Kolegji vlerëson se pretendimi ankimor i ankuesit për realizimin e shtesës në pagë sipas Vendimit Nr.02/39 të datës 08.10.2008 të Qeverisë së Republikës së Kosovës, është i pa bazuar.

Kolegji për Shqyrtimin e Ankesave, bazuar në dispozitat e Rregullores Nr.33/2012 për Shtesat në Pagë dhe Kompensime të Tjera të Nëpunësve Civil, përkatësisht nenin 8 të kësaj rregullore, ka arritur të konstatojë se Ministria përgjegjëse për administratë publike, në bashkëpunim me ministrinë përgjegjëse për financa, mund të kërkojë nga Qeveria që të miratojë një shtesë për kushtet e tregut për pozitat ose llojet e pozitave për të cilat niveli i pagës për personelin e ngjashëm nga organizatat dhe punëdhënësit e tjerë jashtë Shërbimit Civil është së paku 40% më i lartë sesa niveli i pagës që ofrohet nga Shërbimi Civil, e kjo shkakton vështirësi të konsiderueshme në rekrutimin dhe mbajtjen e personelit të kualifikuar për ato pozita ose lloje të pozitave në administratë publike, ndërsa institucioni për realizimin e shtesës për kushtet të veçanta të tregut duhet t'i ofrojë Ministrisë përgjegjëse për administratë publike kërkesën lidhur me arsyeshmërinë e realizimit të shtesës dhe një analize që dëshmon vështirësitë të cilat janë hasur nga institucioni gjatë rekrutimit dhe mbajtjes së personit të kualifikuar, listën e pozitave përkatëse dhe koston vjetore të vlerësimit financiar. Shtesa mbi pagën bazë për kushte të veçanta të tregut nuk mund të tejkalojë më shumë se 50% të pagës bazë.

Andaj, duke marrë parasysh se për realizimin e shtesës në pagë për kushte të tregut, kërkohet paraprakisht aprovimi i një shtesë në pagë nga Qeveria në pajtim me dispozitat ligjore të cekuar si më lart, dhe meqenëse kjo e fundit ende nuk ka aprovuar një shtesë të tillë, Kolegji vlerëson se pretendimi ankimor i ankuesit në këtë kuptim është i pa bazuar.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIQYRËS PËR SHËRBIMIN CIVIL TË KOSOVËS

Lënda me numër A.nr.147/2021

Çlirim ZEKA

Çlirim ZEKA
Procesmbajtës

Ardita Haxhnikaj DEMI

Ardita Haxhnikaj DEMI
Kryetare e Kolegjit

Vendimi i dërgohet:

- Ankuesit
- Sekretarit të Përgjithshëm në Ministrinë e Industrisë, Ndërmarrësisë dhe Tregtisë;
- Udhëheqësit të Personelit në Ministrinë e Industrisë, Ndërmarrësisë dhe Tregtisë;
- Departamentit për Menaxhimin e Zyrtarëve Publik/MPB dhe
- Arkivit të KPMSHCK-së.

